

# Mud Volapüka

Nüm 7

20 mayul 2016

---

## Gramatagul

### Vöds brefikün (baltonatik) Volapüka

#### A

Vöd ,a' pagebon as:

1) jon völada (tökama) pro mödot semik bosa (mödadilo pro balat):

täväkad paselon mö *dolars tel* **a** *balat* = tävakad *bal* **al***ik* suämon *dolars tel*

täväkad paselon **a** *dolars tel* = tävakad **at** suämon *dolars tel*

täväkads paselon mö *dolars fol* **a** *telat* = tävakads *tel* **al***ik* suämon *dolars fol*

täväkads *tel* paselon **a** *dolars fol* = tävakads *tel* **at** suämon *dolars fol*

tökob *penedamäki bal seledik* **a** *penedamäks kil zänedöfik* = udegevoböv eke *penedamäki alik obik seledik bal* bisä atan udegevon obe **plas on** *penedamäkis kil zänedöfik alik*

2) jon mödota jenas kels ijenons ünü jen votik (mödadilo ünü tim semik):

buk at ninädon zänedo *vödis tum* **a** *pad* = *pad* **al***ik* buka at

ninädon zänedo *vödis tum*

vif trena at leigon *milmets tum a düp* = tren at dutävon *milmetis tum ün düp alik*

## E

Vöd ,e' pagebon ad:

1) balön ini lised valodik binetis leigovöladik:

*dauk e pötet* binons härbat = *dauk* binon härbat, *pötet* binon härbat = binons **bofik** härbat

2) kedülön dunotis kel jenons sökaleodiko:

eloegob *falön sui glun e brekön* bovüli = eloegob **nü** *falön sui glun tän* *brekön* bovüli

3) jonön jenis kels jenons leigüpo:

*reinos e fogülos* = anu rein **e** fogül *jenons leigüpo*

Noet: if vöd fovik pos vöd ,e' primikon me vokat, täno tökü ,e' binos vipabik ad gebön vödi ,ed' ko sinif leigik dat distön vödis at de ods:

*egalikób éd* *elöób* dé béd = *egalikob, tän* *elöob* de bed

## I(i)

Vöd ,i' pagebon ad lüükön lü dil ledinik seta lüükoti:

eremob buki tö bukiselidöp, **i** *bodi* *eremob tö baköp* = eremob

buki tö bukiselidöp, **e zu** *bodi eremob tö baköp*

Noet: if vöd fovik pos vöd ,i' primikon me vokat, täno tökü ,i' binos vipabik ad gebön vödi ,id' ko sinif leigik dat distön vödis at de ods:

eremob buki tö bukiselidöp, **id** *eremob bodi tö baköp* = eremob buki tö bukiselidöp, **e zu** *eremob bodi tö baköp*

## O

Vöd ,o' pagebon pro jafäd vokatifa:

Kiof jikat jönik!

**O** *jikat* jönik! = **O** jikat, binol so vemo jönik!

## U,

Vöds ,u' ,ü' pagebons ad nümädükön binetis mögik (mögis) as lised:

ulükömob tü döp *mälid u velid* = ulükömob-la tü döp *mälid, ab i baiko* ulükömob tü döp *velid*

Noet: if vöd fovik pos vöds ,u' u ,ü' primikon me vokat, täno tökü ,u' , u ,ü' binos vipabik ad gebön baiädiko vödis ,ud' u ,üd' ko sinif

leigik dat distön vödis at de ods:

*odelo oreidob buki **ud** ukömob teatöpio*

~

Vöd ,ä' labon sinifi äsä vöded ,ed i'.

Noet: if vöd fovik pos vöd ,ä' primikon me vokat, täno tökü ,ä' binos vipabik ad gebön vödi ,äd' ko sinif leigik dat distön vödis at de ods:

*odelo oreidob buki **äd** ukömob teatöpio = odelo oreidob buki **ed id** ukömob teatöpio*

Vöd ,ö' pagebons ad notodön stuni:

**Ö!** No nolob atosi.

# Sevols-li, das ...

## Bosnän e Härzegovän



1) Bosnän e Härzegovän idageton libi de Yugoslaviän tü yel 1992 e binon bal läns yunikün vola.

2) Sürfat mu nilü lölik ela ‚Bosnän e Härzegovän‘ pitegon fa yebaläns e fots beliks.

3) Slam binon rel ledinik ela ‚Bosnän e Härzegovän‘. Oni slopons plu kildil sifanas läna. I tö Bosnän e Härzegovän lemödot kritanas dabinon.

4) Stedölo pos dagetam liba okik tö Bosnän e Härzegovän sifanakrig iprimikon kel idulon sis yel 1992 jüs yel 1995. Ünü



sifanakrig at cifazif el ‚Sarajevo‘ äliedon beleseati ed in zif boums isplodons nenzediko. Sekü atos bumotis plu kildeglulmil pidistukons e mens plu degbalmil pideadons. Ab hogs in levegs kö mens pideidons demü slods boumas pibeseitons me tar redik pla sfal nulik. Klu igo anu kanoy logön skaris kriga at, kels panemons „rosads ela ‚Sarajevo‘“.



5) Völäd ela ‚Bosnän e Härzegovän‘ panemon ‚konvertibilna marka‘ (‚mak leceinöfik‘).

6) Bosnän e Härzegovän binon davedöp dilekana filmik jiel ‚Jasmila Žbanić‘.



# Lerät



Konäd somik dabinon. Balna hiel ‚François Rabelais‘ ägekömom de zif ‚Roma‘ lü zif ‚Paris‘ ed istebädöm tö lotidöp zifa el ‚Lyon‘. Gödo ipladükom tö spad sienovik pö lotidöpacem okik päkilis papürik kil ko penäds tefädik sui ons - „Poison pour le Roi“ („Venen pro hireg“), „Poison pour le Reine“ („Venen pro jireg“) e „Poison pour le Dauphin“ („Venen pro geraleson“). Kikodo lautan famik idunom atosi?

Tuvedot: in nüm sököl.

Tuvedot leräta se nüm büik:

Dabinons dels deg de 14 jü 19 efe te nums 18 e 19 komons balna. If motadel jiela ‚Cheryl‘ binonöv del 18 u 19, täno hiel ‚Bernard‘ sunädiko ökanom sevädükön i muli.

Ab lio ‚Albert‘ inolom, das hiel ‚Bernard‘ no inolom tuvedoti? If jiel ‚Cheryl‘ inunoföv hiele ‚Albert‘, das pimotof ün mayul u yunul, täno motadel ofik kanon binön mayul 19 u yunul 18. Pö atos hiel ‚Bernard‘ kanom nolön kitimo motadel jiela ‚Cheryl‘. Jenöfot, das ‚Albert‘ nolom kuratiko, das ‚Bernard‘ no nolom tuvedoti, sinifon das kanobs pläön mayul e yunul, klu ‚Cheryl‘ pimotof ün yulul u gustul.

Büiküno ‚Bernard‘ no inolom kitimo motadel jiela ‚Cheryl‘. Lio ituvom tuvedoti pos küpet hiela ‚Albert‘? Bevü dels lul iposbliböl ün yulul e gustul, kel pladikons de 15 jü 17, te del 14 komon telna. If ‚Cheryl‘ inunoföv hiele ‚Bernard‘, das pimotof ün del 14, kludo hiel ‚Bernard‘ pos niludam hiela ‚Albert‘ no nog ikanom notükön tuvedoti verätik. Jenöfot et, das sunädiko isuemom valikosi, sinifon das ‚Cheryl‘ pimotof no ün del 14. Dels kil luveratik posblinons: yulul 16, gustul 15 e gustul 17.

Posä ven ‚Bernard‘ ispikom, ‚Albert‘ inolom, kitimo motadel jiela ‚Cheryl‘. Ifü inunoföv ome, das pimotof ün gustul, ‚Albert‘ no ökanom nolön tuvedoti verätik, bi dels tel kilas iposblinöl stadons ün gustul. Kludo, ‚Cheryl‘ pimotof ün yulul 16.

Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».